



पत्रुसए

छींनीकाव ओसरो चिथी

आव चिथी पत्रुसए फरी छींनीकाव ओसरो ज़ (२ पत्रुस ३:१)। उसंक्ताव ओसरो चिथील पाखाडाव मिंराए परमेस्वरए ओपाँतावराए याखिरी पसिद दुखर याव ज़ यारानैज्याव सरै:सिउ लिज्या। आव चिथील ते भन याखालाव मिंराए ज़ परमेस्वरए ओपाँ तँदा बले-द माचाहिउ पाँर पैन्या ओछ्यास लिज्या लिन्या ब सरै:सिउ लिज्या (२:१-३; ३:३-४)। निताव छ्यासनी पत्रुसए नोरालाई जोगोइद, 'परमेस्वरए उबुद्धीर ओगेर क्याँए मीं ज़ जैव ताके' लिद नोरालाई ओरासम्जैज्याव (१:३-११)। प्राइँरानी ओचाहित ल्यो आव ज़ — ख्रीस फरी ओमाहुवा पै ओदयाल थंरिद ओललाई भन ज़ सरेस्नाव ताके (३:१४-१८)।

१ डा सिमोन पत्रुस येसु ख्रीसए ओनोकोर सोनो ओसाचीए डाल्योनी आव चिथी जे, गे माँ:ती, उगुन ल्यो युँ हुबो पाँ दैवराए जूँनी परींद डाल्याचिज्या। आव पाँ गेपरमेस्वर सोनो गेलाई बाँचैज्याव येसु ख्रीसए गेजूँनी सतस ओदोज्यावनी ज़ गेदैके। २ जे गेप्रभु येसु ख्रीसए ओपाँ सैंद परमेस्वरए ल्योदा जेखैज्यावए ओल मनी जेल्योदा उयुँ गराँद जेयुँ होलाँ जैद ओयाचिउक।

परमेस्वरए ओगेर उबुद्धीर क्याँए मीं
जैन्या

३ गेलाई परमेस्वरए ओल उगुन सोनो ज़गै मगैव ओगेनी खुल्द नैसिउ। गे ओललाई चावस गेसरेसोए परमेस्वरए गेलाई ओल ओसक्तीनी सा:रो ताद ओगे रैन्याए जूँनी प्राइँ जोरैद नैदचासिउ। ४ निताव जोरैद ओयासिउनी फरी गेलाई बनै घेप्पा ओचाहित ल्यो याकार याद नैसिउ।



नो परमेस्वरए ओयासिउ याकारानी
गे आव जुकलाव माचाव चेतैन्यानी
हुज्याव फ्याःन्या मान्यानी पुलुस्द
परमेस्वरए ओगे रैन्यार गेताज्या।

५ है जैद जे ओल ओगे रैन्या ताकिन
परमेस्वरए ओपाँत जेरुँ सुहुप्द धर्मदा
कलँ लिच्यो। धर्मर दाद ओपाँर भन
ज़ पाल्च्यो। ६ ओपाँर थःरैद, तहस
लिद, भन ज़ थःरिद, परमेस्वरए
उरुँलाव मिताव जैसिच्यो। ७ ओल
उरुँलाव मिताव जैसिद नैं मेंए ल्योदा
रुँ गराँव जैद, तोबोए तोबोलाई मया
दासिच्यो। ८ आव गुनर चावस रैद
जेरुँल जेसबाःकिन जे कान्ल ज़
काम मालागिउ अनाकलावर तान्या
जेमाले। बुरू गेप्रभु येसु ख्रीसए साचो
उबुद्धी भरी जे ज़ रैन्या जेले। ९ खाली
जोस आव मिताव गुनर माले, नो मिँ
तादाड मारँःधुन्या मुन्दुक्यासो मिताव
ताज्या। डादाडाव ओपापर परमेस्वरए
क्याल्द ओयो ब माचेतैव।

१० है जैद जे डानैं डामेर, परमेस्वरए
डादा ज़ थःरैद थामिद ओरानैज्यावल
'गे ब नल ज़ गेताक' लिद जोर
दोच्यो। इताव जेदोकिन जेरुँ हुबो
पाँलाई खर्क ज़ मारास्द, ११ गेलाई
बाँचैज्याव गेप्रभु येसु ख्रीसए
ओराज्याल ताल तोल माताद ज़
पसिउ दैन्या जेले। नो राज्या खर्क ज़
खेम्या माले।

याका जैद नैद डायचिए

१२ जे इताव पाँर डादाकिन ज़ दैद
जेसैवए ओसतत थःरिद जेले लिन्या
डासैज्या। हैदी ब डा जेलाई सम्जैन्यात
एकम्या भाःसिद डाले। १३ डा आव
मानुवात डालेवा भरी इताव पाँरानी
परमेस्वरए ओयेनत जेसा हाइदचान्या
डायेन ज़ लिज्या। १४ काराव ल्यो
ताकिन डा आव मानुवानी बान्या बेला
हुद ले लिन्या डासैज्या। नो डादा गेप्रभु
येसु ख्रीसए ज़ है ओदाँव। १५ है जैद
आव पाँर डा डसिउ छीनी घमामेंःरक
लिद याका जैद नैद डायचिए।

ख्रीसए ओसक्तीर गेमीए ज़ गेरँःके

१६ गे गेप्रभु येसु ख्रीस बनै सक्तीस
फरी ब हरिज्या लिन्या पाँर जेलाई
गेसथैचिक गेनी ससैद माचाहिउ घर्ती
बिन्तीरानी गेसथैचिज्याव ते माःक,
ओल ओसक्तीर ओज़गैर आव गेमीए ज़
रँःद गेनै। १७ हो गेरँःव छचाम ज़ ओबाबु
परमेस्वरए येसुलाई ओमानर याद ज़गैव
ब जैक्यो। हो बेलाक ज़ फरी स्वर्गताव
माहान परमेस्वरए ल्योनी तोबो गा अड
लिद हुके, “आव डायुँलाव डाजा ज़,
आवलाई रँःद डायुँ होलाँ ताज्या।”
१८ आव स्वर्गतिन हुव पाँ भरी गे
ओलस लिज्यावराए नो चोखो दाँदात
गेलिज्याक आव गेर्नाए ज़ गेथैके।

१६ है जैद ड़ादा ख्रीसए उजूनी अगमबक्ताराए यापाँ भरित गेयुँ भन ज़ हुपुज़्या। जे मनी नो पाँत बनै धिद ज़ लिच्यो। ख्रीस फरी ओमाहुवा पै नो पाँ चुम चुमोल में: तै:सिउ मिताव ज़ लिज़्या। ओल उहुवत फरी छकालन्याकाव सोम्पा जेयुँल ज़गै ओताव मिताव ज़ तारिज़्या। २० आव ब सैच्यो, धर्मसास्त्रलाव पाँ मिँए सिजैद सर्सिउ ब मा:क, २१ नो पाँ मिँए युँ स्यानी हुव ब मा:क। छैव पुरूस मिँराए याया:त चुसिद परमेस्वरनी ज़ पाँकेर।

धुतनी पैज़्यावराए सजा दैन्या लेर

२ हो बेलक इस्त्राएलीराए याखाल् रूवा रूवार परमेस्वरए उमिन हाइद धुतनी पैज़्यावर ब यालिज़्याव। जे जेखाल् ब हितावर तोबो नेब्लो तान्या लेर। नितावराए याबाथैनी बले:न्या धुत पाँर पैद यालाई फुर्सुल जैज़्याव यागैलाई मनी रास्न्या लेर। ननी ज़ यालाई खेमन्या सजा यानी ज़ रैरिज़्यार। ३ हितावत ब लाज हुव येन यारापैज़्यावदा कुधु ज़ बान्या लेर। ननी ज़ साचो येम ब बलेस्न्या ले। ३ नो पैज़्यावराए लोभ वाज़ दाद, 'कसा मिँर गेल्योदा गेमाराजैए' लिद

जो थैव पैज़्यार हो ज़ यारासथैज़्यार। नितावरालाई यासजाए याछीं याछीं खेपैहुद जप जप ओराजैहुव मिताव ज़ लिज़्या।

४ परमेस्वरए ओचाकज्यार ब ओल-किन तँदा याजैसिक नोरालाई बाँखी मानैद नर्गल याख्याक्यो। नल सजा यान्या छचामकावए जूनी तल्ना नामलाव चुम चुमोल थुनैद यानैव।

५ नोआए ओपालाक ब पापीराए जूनी परमेस्वरए संसारल बनै घ्यो:व भल भा:द सुलाई ज़ बाँखी मारानैक्यो। नो धर्मलाव पाँ सथैज़्याव नोआलाई वाज़ उफ़िमलाव सात जनारास यानैक्यो।

६ सदोम सोनो गमोरा सहरलाव-रालाई सफ्या:न्या सजा परींद ओराएक नलाव लिज़्याव भरिलाई चुयाप याजैक्यो। ननी ज़ अधर्म दाज़्यावरालाई किताव ओताज़्याव लिन्या सतैसिउ मिताव लिज़्या।

७ परमेस्वरए नलावरानी तोबो धर्मी लोतलाई वाज़ बाँचैक्यो। लोत नो यार्ती माल्यो लाज मोर्नो येन दोज़्यावर रँ:द ओसोगो ओलागिज़्याव। ८ नो धर्मी नितावरास उलिज़्याक दिनकाव ज़ माचाव यायेन रँ:द थैद उयुँ घो ज़ उलिज़्याव।

६है जैद परमेस्वरए ओल उमिनत लिङ्यावरालाई धो सहिउनी ओरा-पले-धुङ्याव ननी ज़ रैं:ङ्या। अधर्मीरालाई फरी फाल्न्या छचाम ओमाहुवा पै सजा धूँल यानैङ्याव। १०नो सजा धूँल लिङ्यावर यारुँनी हुङ्याव भरित यारुँ मानैधुद मादान्या येन दाद परमेस्वरए ओहक धूँल मालिङ्यावर ज़।

याग्यान माल्यो पुसु स्यासोर

नोर भन बनै स०द स्वर्गताव यासक्ती ल्योरालाई रैं:द माछे:द भन हसैद ल०ङ्यार। ११स्वर्गताव परमेस्वरए ओचाकज्यार ते आव मिँराकिन भन यासक्ती ल्योर यामान ल्योर लिङ्यार। हितावत ब परमेस्वरए ओङ्गाक स्वर्गताव यासक्ती ल्योरालाई यापाहा ब भा:द माराए, यामिन ब बले:द माराए। १२खाली आव मिँराए ते स्वर्ग-तावर इतावर ची याल्यो लिन्या ब मासैद यामिन बले:दचाद ल०ङ्यार। है जैद आवर च़ेंल सगैद सै:न्या याग्यान माल्यो पुसु स्यासोर ताद फ्या:न्या म्मान्यादा बाद, १३मादान्या यादोव भरी याज़ भुगिरिङ्यार। इतावर लाक ब दुलिद यारुँनी जो हुङ्या हो ज़ दाद रेंव ज़ लिङ्यार। इताव माछाँवर

प्रभु-भोजल जेस ज़्यान्या ते युँ माजामो ज़ लिङ्या। १४नोर मेंमाराए ल्योदा यामी कुँ खर्क ज़ मावाँ:द पाप दाव ज़ नैङ्यार। यारुँ तोबो पोक माल्यो-रालाई पापल यारापारैङ्यार। निताव याफ्या:हुवराए लोभ दान्या ते बनै सैङ्यार। १५साचो येमलाई रास्द भन बिप्यादा बाद लेर। नोर मादान्या येनर दाद रूप्या कमैव पैङ्याव बओरए ओज़ा बालामए ओयेमल ज़ बाकेर। १६नो बालामए माचाव येन दोव ओपै-ङ्यावए गाल तोबो दैक्यो। ओगधाहाए ज़ मिँए ओर्गानी पाँद मादान्या दाव ओपैङ्याव येनलाई वैदिक्यो।

१७निताव मिँर री माल्यो सा-व रीमुल मिताव रितो ज़ लिङ्यार, सोनो बतासए उसुभुङ्याव कोहो मितावर ब लिङ्यार। नितावराए यारुँ चुम चुमोल नैसिउ लिङ्या। १८अन्नाकलाव पाँर वै वै जैद, मिँरालाई याल्योदा जैन्याए जूँनी, 'जेरुँनी जो हुङ्या हो ज़ घदोच्यो' है दाद यारामोहोनैङ्यार। ख्वार ते भर यापापलाई रास्द परमेस्वरए ल्योदा बाङ्यावरालाई ब फरी निताव माचावल यारापारैङ्यार। १९नोराए, 'गे परमेस्वरए ओकानुननी पुलुसोर गेलिङ्या, जो गेदोदी ब ताए' है यालिदी ब माचाव यायेनए उधूँल ते किसिउ लिङ्यार।

जोलाई उयुँए ओपैँज्याव भरिए उस्किउ मायो, नो मिँ नल ज़ बाँदा ताज्या।

२० जो गेलाई बाँचैँज्याव गेप्रभु येसु ख्रीसए उजूनीकाव पाँ सैंद आव मानुवाताव मादान्या येननी पुलुस्द ब फरी ओल्द होल ज़ ओबाकिन, नोलाई डादाडावकिन भन छीनीकाव माचाव ताज्या। २१ नितावर परमेस्वरए छैंव ओपाँ दैद ब फरी याछींदा याओलोए नोराए बुरू परमेस्वरए ल्योदा बान्या येम सैं ज़ यामासैँकिन तान्या ओल्यो। २२ नितावरालाई घर्तीलाव सर्सिउ स्यासो ज़ ताद ले। नल, “काःए ओवैः ओल ज़ ओल्द ज़्युहुज्याव,” सोनो, “ऊलाई छेद ब हिलाल ज़ लुइसिनाज्या।”

परमेस्वरए पापीरालाई सजा यान्या छ्याम

३ अ डायुँलाव डानैं डामेर, आव चिथी डादाडाव डापरींस नेब्लो ताकिनी। आव नेब्लो चिथील ज़ जेलाई सम्जैद छैंव जेयुँलाई भन ज़ सभेंद डयाचिज्या। २ भाःकाव छैंव अगमबक्तराए यापाँ सोनो गेलाई बाँचैँज्याव गेप्रभु येसु ख्रीसए ओराअर्थैव भरी ओसाचीराए यायाःनी जेथैव पाँ ब मामेंद चेतैच्यो लिद डसज्या।

३ पाइँरानी डात आव सैंच्यो, ख्रीस फरी उहुन्या बेलाक मिँराए परमेस्वरए ओपाँलाई हसैद जो यायुँनी हुज्या हो ज़ दाद ल०व ज़ लिन्या लेर। ४ नोराए अइ लिन्या लेर, ‘खै, ख्रीस फरी हरिज्या लिन्या ओयाचिउ याका काराव ओमायोःज्याव? गेसाखा पुर्खाराए पालाकिन आःपै परमेस्वरए आव संसार किताव उसिजैव, हिताव ज़ लिज्या,’ है दान्या लेर। ५ निताव यापाँए तोबो पाँ ते मेंद नैर — परमेस्वरए ओल ओपाँनी आव नाम सोनो नम ओजैज्याक री भरिलाई नेभा जैद तभा नमत भाःक्यो, तभा नामल नैक्यो। ६ तछा नो रीर ओराथोमक बनै घयोःव भल हुद आव नामलाव लिज्याव भरी यासफ्याःक्यो। ७ फरी ओल ओपाँनी ज़ आज्यालकाव नाम नमलाई ब मेंःए खेमन्याए जूनी नैसिउ लिज्या। हो छ्याम ज़ पापीरालाई ब सजा याद यासफ्याःरिज्याव।

परमेस्वरए उरिस थामिउ ज़ नैज्याव

८ अ डायुँलाव डानैं डामेर, आव पाँ ब तामेंच्यो, परमेस्वरनी ते तछा हजार बर्स स्यासो ब लिज्या, हजार बर्स तछा स्यासो ब लिज्या। ९ प्रभु फरी हरिज्या लिन्या ओयाचिउ याका

रूवा रूवाराए याबिचारनी धिलो ओरें:दी ब ओल ते धिलो मादोव। ओल ते भन प्राईए जेयेन सहिद, 'सु ज़ नर्गल माबाद डाल्योदा याहुकिन ताखेहो' लिद कींद नैचिउ। १०खाली प्रभु हुन्या छ्याम कुना हुज्याव मिँ स्यासो सुए ज़ यामासैंद उमँ:जानी हरिज्या। हो बेलाक नम बनै स्यो स्यो क्रिद खेम्द, नताव लिज्याव सोरोर स्यावैर यानी ज़ चाँ:द चुयाप तान्या लेर। आव नाम स्रोनो नलाव लिज्याव भरी ब चक चक खेमन्या ले। ११-१२आव संसार नितावनी ओखेम्रिज्यावए जे प्रभु उहुरिज्याव छ्यामकावए जूनी खर्क हुके लिद कींद जेनैक परमेस्वरए ओसतत लिद बनै छैवस लिच्यो। हो बेलाक नम बनै चाँ:द चुयाप तान्या ले। नताव लिज्याव सोरोर स्यावैर ब प्राई ज़ येप येप रावए बिलैन्या लेर। १३हैदी ब गे ओयासिउ ग्राकानी सत वाज़ लिन्या सा:रो नाम नम ओजैरिज्याव ओयेम चिऊद ज़ गेनै।

ख्रीस फरी ओमाहुवा पै थ०रिद लिन्या

१४है जैद डायुँलाव डानैँ डामेर, जे नो ओयेम चिऊन्यार जेतावए, 'ओल

उहुक गेलाई गे गेल खैवर, थ०रिउर, गेखत माल्योर ओदैहुसिउक' लिद धिद लिच्यो। १५आव ब सैंच्यो, परमेस्वरए गेलाई प्राईँ सहिदद्याद कींद ओनैसिज्यावनी अजम्बरी जुनील बान्या मौका यासिज्याव। गेयुँलाव मिताव गेदाज्यु पावलए मनी परमेस्वरनी ओदैव बुद्धीनी हिताव ज़ सर्द नैदचाचिउ। १६इताव डापाँर पावलए छुत छुत ओचिथील ब कुधु ज़ सर्द यानैव। रूवा रूवा ओसरोर जाँ धो बुफिउ ताद यार्ती माल्यो माथ०रिउराए तँदा ज़ लाँज्यार। धर्मसास्त्रलाव पाँर ब नदा ज़ जोरैनाज्यार। नितावराए यानोक्सान याज़ जैज्यार।

१७है जैद डायुँलाव डानैँ डामेर, जे इताव पाँरानी डादा ज़ सैंद जेतहस लिच्यो, मानी माचाव मिँराए गलती यापाँल अलमलिद, थ०रिद जेलिज्यावलाई समैन्या जेले। १८बुरू गेलाई बाँचैज्याव गेप्रभु येसु ख्रीसए ओदयाल थ०रिद ओललाई भन ज़ सरेस्नाच्यो। ओललाई आख ब, छींङ पै ब बनै ज़गै मगैव ज़ ओताक। आमन।